

Angerlarsimaffinni inoqutigiinnit eqqakkanut Qeqqata Kommuniata maleruaqqusaa

Avatangiisit innarlitsaaliorneqarnissaanik Inatsisartut inatsisaat nr. 9, 22. november 2011-meersumi, Inatsisartut inatsisaat nr. 16, 1. december 2021-meersumi (avatangiisinut inatsit) allanngortinneqartumi § 36, imm. 3, § 39, imm. 1 aamma § 66, imm. 3 kiisalu Eqqakkat pillugit Namminersorlutik Oqartussat nalunaarutaat nr. 3, 7. januar 2021-meersumi (eqqagassalerinermut nalunaarut) §§ 18-20 naapertorlugit aalajangersarneqarput:

Kapitali 1

Atuuffeqarfia

§ 1. Maleruaqqusami matumani Qeqqata Kommuniani angerlarsimaffinni inoqutigiinni tamani eqqakkanik katersisarnermut aaqqiissutinut, innersuussinissamut aaqqiissutinut aammalu tigussaasumik innersuussinermut malittarisassanik aalajangersaavoq.

Imm. 2. Maleruaqqusami matumani piumasaqaatinut eqqagassaqalersitsisoq immikkut akuersisummik tunineqarsinnaanngilaq.

Kapitali 2

Siunertaa nassuiaatillu

§ 2. Torersumik eqqakkanik immikkoortiterinissap, mingutsitsinnginnissap aammalu mingutsitsinerit pinngitsoortsinnissaat kiisalu eqqakkanik atoqqisoqarnissap aamma atoqqinneqarnissaannik siuarsaanissap qulakkeernissaa maleruaqqusatigut siunertaavoq.

§ 3. Eqqakkat pillugit Namminersorlutik Oqartussat nalunaarutaanni qaqugukkulluunniit atuuttumi nassuiaatit maleruaqqusani matumani atuupput.

Kapitali 3

Eqqagassaqalersitsisup pisussaaffi

Atuisussaatitaaneq

§ 4. Eqqakkanik katersisarnermut aammalu innersuussinissamut aaqqiissutitut aalajangersakkanik atuinissamut eqqagassaqaalersitsisoq pisussaaffeqarpoq.

Imm. 2. Eqqakkat maleruaqqusani allaaserineqanngitsut eqqarsaatigalugit inoqutigiit eqqagassaqaalersitsisut kommunalbestyrelsimut saaffiginnissuteqassapput, taakkulu eqqakkat iginneqarnissaannut erseqqissumik innersuussuteqassallutik. Eqqagassaqaalersitsisup eqqakkat iginneqarnissaannut innersuussutaasut atussavai tamatumunngalu atatillugu aningaasartuutit matussusernissaannut kommunip akigitatut aalajangersagai akilertassallugit.

Imm. 3. Eqqagassalerinermut aaqqiissut naapertorlugu eqqakkat immikkoortunut eqqortumik iginneqareernerisa kingorna, eqqagassaqaalersitsisoq akisussaajunnaassaaq.

Immikkoortiterisussaatitaaneq

§ 5. Eqqagassaqaalersitsisup eqqakkat immikkoortuni katersisarnermut aammalu innersuussinissamut aaqqiissutini allaaserineqartut naapertorlugit immikkoortitissavai.

Nalunaartarnissamut pisussaaffeqarneq

§ 6. Eqqagassaqaalersitsisut kommunalbestyrelsip peqqusineratigut matumani malittarisassat naapertorlugit eqqagassat iginneqarneri pillugit paasissutissiisussaatitaapput.

Imm. 2. Kommunalbestyrelsi eqqagassaqaalersitsisumik akiliisitsinissamut pisinnaatitaaffeqarpoq kiisalu eqqakkat katitigaaneri pillugit, kommunalbestyrelsi eqqakkanik avatangiisitigut isumannaatsumik isumaginninnissaanik qulakkeerinninnissaanut pisariaqartunik paasissutissanik piumaffiginninnaalluni.

Toqqortarinnittussaatitaaneq eqqaasussaatitaanerlu

§ 7. Eqqakkat isumannaatsumik, immikkoortillugit matoqqatillugillu toqqortarinnissaannut kiisalu eqqaaviit eqqiluisaarnissaannut eqqagassaqaalersitsisoq pisussaaffeqarpoq.

Imm. 2. Kommunalbestyrelsi peqqusisinnaavoq eqqakkat toqqortaait piaartumik peerneqassasut, matumani mingutitsisut, eqqiluisaartitsinngitsut, tipittut assigisaalluunniit ilanngullugit.

Kapitali 4

Aaqqissuussinerit assigiinngitsut

Piumasaqaatit nalinginnaasut

§ 8. Aaqqiissutaasuni immikkoortunut aalajangersakkat naapertorlugit eqqagassat immikkoortut iginneqareeraangata aatsaat eqqagassaqaalersitsisup akisussaanaera atorunnaarsinneqassaaq. Kommunimi sulisunut imaluunniit allamit ingerlatsisumut eqqagassanik tiguisumut eqqakkat annertussusaat imaluunniit suussusaat isumaginninnissamut imaluunniit suliffimmi avatangiisinut ajornartorsiortitsippata, igitsinissamut periarfissamut allamut innersuussinissamut imaluunniit aggorneqarlutik, poortorneqarlutik assingusumilluunniit suliarineqaqqaarnissaannik piumasaqaateqarnissamut kommunalbestyrelsi pisinnaatitaavoq.

Imm. 2. Nunap timaani eqqagassat pilersinneqartut illoqarfimmut imaluunniit nunaqarfimmut assartorneqassapput aaqqiissutaasunilu immikkoortunut aalajangersakkat naapertorlugit tunniunneqassallutik.

Imm. 3. Eqqakkanik maaniinnaq ikuallaaneq inerteqqutaavoq.

Imm. 4. Nunaqarfinnut ataasiakkaanut erseqqissumik allatut innersuussisoqarsimangippat, katersisarnermut aammalu innersuussinissamut aaqqiissutitut nassuiarneqartunut nunaqarfiit aallaavittut ilaapput.

Katersinermi aaqqiissuusinert

§ 9. Katersisarnermut aaqqiissuusinermi kommunalbestyrelsimit innersuunneqartumut tunniussivimmut imaluunniit katersuivimmut eqqagassaqaalersitsisup eqqagassaatinik igitsinera pineqarpoq. Tamatuma kingorna eqqakkanik isumageqqiinnissamut akisussaaffik kommunalbestyrelsimit tiguneqassaaq.

Imm. 2. Katersisarnermut aaqqiissutip ingerlanneqarnissaa suliffeqarfimmut namminersortumut, igitsereerermi eqqakkat suliareqqinnissaannik akisussaaffimmik tigusiutigisussamut suliariumannittussarsiuunneqarsinnaavoq.

Innersuussinermi aaqqiissuusinert

§ 10. Innersuussinermi aaqqiissuusinerni kommunip tigooraaviani, ataatsimoorussamik kommunit eqqagassalerinermik ingerlatsiviani imaluunniit ingerlatsisumit allamit kommunip isumaqatigiissuteqarfigisaanit maleruagassami innersuussinert naapertorlugit eqqakkat iginneqarnissaannut eqqagassaqaalersitsisup akisussaaffigaa.

Imm. 2. Niooqqaanissamut innersuussuteqartup innersuussutigisaa qaqugukkulluunniit eqqagassaqaalersitsisumit malinneqassaaq.

Imm. 3. Eqqakkat kukkusumik immikkoortitikkat, piumasaqaatinik naammassinninngitsut imaluunniit maleruagassami matumani aalajangersakkanik allatigut malinninngitsut itigartitsissutigineqarsinnaapput.

Ersarissumik innersuussineq

§ 11. Eqqagassat katersisarnermut innersuussisarnermullu aaqqiissuusinernut atuutereersunut ilaangippata eqqagassaqaalersitsisoq kommunalbestyrelsimut, igitsinissamut periarfissamut ersarissumut innersuussisussamut saffiginnissaaq.

Kapitali 5

Katersisarnermut aaqqiissummut eqqagassat immikkoortut ilaapput

Eqqakkat uumasuneersut

§ 12. Eqqakkat immikkoortunut eqqakkat uumasuneersut, tassa qimmit uumasullu minnerit allat kiisalu pisanit sinnit, soorlu puisimit, arfermit aavermillu, aalisakkanit aammalu tuttunit umimmannilluunniit eqqagassat ilaapput.

Imm. 2. Eqqaavinnut containeriusunut tamanut atugassanngortinneqarsimasunut imaluunniit kommunip tigooraavianut eqqagassaqaalersitsisoq eqqagassanik igitsissaaq. Tamanna sioqqullugu eqqakat piniarnermi puunut, anartarfiit puussiartaannut imaluunniit ilitsivik isumannaakkamut poorneqaqqaassapput.

Eqqakkat nalinginnaasut

§ 13. Eqqakkat nalinginnaasut tassaapput illumi atortunik piiareernermi eqqakkat sinneruttut, soorlu iggavimmit, nerisakunit, pappiliaq qeratasuunit, papplissanit, plastikkinit, nangikunit aamma nammineq atugassanik piniarnermi aalisarnermilu sinnikut eqqagassat. Eqqakkani nalinginnaasuni igalaamerngit, savimerngit, batteriit, kemikalit imaluunniit avatangiisinut navianaatillit eqqagassat allat ilaanngillat.

Imm. 2. Eqqakkanut nalinginnaasunut aaqqiissummut imaartittarnissamut amerlassusissanik pisariaqartinneqartunik nalunaarsorneqarnissaaq eqqagassaqaalersitsisumit qularnaarneqassaaq, taamaaliornikkut imaarneqarnerit marluk akornanni eqqaaviit ulikkaartoortassanatik. Imaartittarnissamut atorunnaarsitsinermullu nalunaarsorneqarneq kommunip nittartagaatigut, innuttaasunik kiffartuussivikkut imaluunniit nunaqarfimmi allaffimmu ingerlanneqassaaq.

Imm. 3. INI-mi attartortunut atatillugu eqqiluisaarnissamut atatillugu sullissinermi INI, kommunip aamma Namminersorlutik oqartussat akornanni isumaqatigiissut malinneqassaaq.

§ 14. Eqqagassaqaalersitsisoq nammineq akilikkaminik eqqakkanut nalinginnaasunut naammattunik eqqaavinnik pissarsissaaq, inissiinissaaq aserfallatsaaliinissarlu pisussaaffigaa. Eqqagassaqaalersitsisup tassunnga atatillugu aningaasartuutit suliarissavai.

Imm. 2. Eqqaavinnut, puussiarsuarnut imaluunniit eqqaavinnut containeriusunut tullinnguuttut atuupput:

- 1) eqqagassat nalinginnaasunut taamaallaat atorineqassasoq,
- 2) atortunik inngigissunik ipitsunilluunniit poortorsimanngitsunik imaqaassanngillat,
- 3) eqqaavik akornutitaqanngitsumik ammarlugu imaarneqarsinnaasussaavoq,
- 4) ingerlavimmut aputaajaanermulluunniit ajoqutaanngitsumut inissinneqassasoq,
- 5) eqqaavilerisut biiliinut ungasissuseq 50 m.-mik ungasissuseqassalluni kiisalu aqputaa tamaat sinerlugu minnerpaamik 2,5 m.-mik portussuseqassalluni,
- 6) ukioq naallugu aqqusinermi appakaaffissami ingerlavigineqarsinnaasumut manissumullu inissinneqassasoq,
- 7) tipinik akornusersuinissaa minnerpaaffissaaniitinniarlugu inissinneqassasoq, aamma
- 8) sumiiffiata eqqaa eqqiluisaartinneqassasoq.

§ 15. Eqqagassat ikinnerpaamik sapaatip akunneranut ataasia iginneqartassapput, taamaaliornermi tipi annikinnerpaasinniarlugu. Eqqakkat annertussusaat naapertorlugit sapaatip akunneranut imaartittarnissamut pisariaqartinneqartutut nalilernerqartutigut eqqagassalerinermut aaqqiissummut nalunaarnissaannik kommunalbestyrelsimit piumasarineqarsinnaavoq.

Imm. 2. Sisimiuni eqqakkat kommunip ikuallaavianut iginneqartassapput. Maniitsumi, Kangaamiuni, Atammimmi, Napasumi, Kangerlussuarmi, Sarfannguani aamma Itillimmi eqqakkat kommunip tigooqaavianut iginneqartassapput.

Poortuutissat igalaamernit

§ 16. Igalaamernit puukut tassaapput vinnip, marmeladip puukui aamma igalaamernit aserornikut.
Imm. 2. Igalaamerngit eqqiarnikut containerinut tamanit anguneqarsinnaasunngorlugit igalaamerngimik ilisarnaaserlugit inissinneqarnikunut eqqagassaqaalersitsisumit iginneqassapput.

Poortuutissat savimernit

§ 17. Savimernit puukut tassaapput, qillertuusarmiu, imigassamut sodavandinullu qillertuusat.
Imm. 2. Puukut savimerngiusut eqqiarnikut containerinut tamanit anguneqarsinnaasunngorlugit savimerngimik ilisarnaaserlugit inissinneqarnikunut eqqagassaqaalersitsisumit iginneqassapput.

Eqqakkat angisuut

§ 18. Eqqakkat immikkoortuni pisattat annertunerusut pineqarput, assersuutigalugu pequtit, sisoraatit, sikkilit, savimerngit, saffugassat, dunkit, madrassit kiisalu igaffimmi errorsisarfirmilu atortut tassaasut nillartaartitsiviit, qerititsiviit, kissarsuutit, errorsiviit, erruiviit, microbølgeovnit il.il.
Imm. 2. Eqqakkat angisuut eqqakkanut angisuunut containerinut, tamanit anguneqarsinnaanngorlugit inissinneqarsimasunut eqqagassaqaalersitsisumit iginneqassapput imaluunniit kommunalbestyrelsemnit aaneqartussanngorlugit aqquuserngup sinaanut inissinneqassapput imaluunniit kommunip tigooraavianut tunniunneqassapput.

Kapitali 6

Eqqakkat immikkoortut inniminniinermut aaqqiisummut ilaapput

Imassat aamma sakkut

§ 19. Imassat, aallaasit, qummoroortut, ajunaalerluni kalerrisaarutit qamutillit imassaat suugaluarpataluunniit eqqakkat immikkoortunut ilaapput.

Imm. 2. Siumut nalunaarutigereerneratigit imassat atornikut kommunip tigooraavianut eqqagassaqaalersitsisumit iginneqassapput. Imassat atorsinnaasut, aallaasit, qamutillit imassaat allallu politiinut tunniunneqassapput.

Betonngi aamma qarmakkat

§ 20. Beton allamik akoqanngitsoq betonimit ilitsivimmeersoq saviminertaqanngitsoq. Qammakkat ilagaat qammagassiat, marraat aamma multipladit.

Imm. 2. Betonngit saviminernik qajannaallisaataasa annerpaamik 2 cm.-imik anillanganerat, betonngit eqqakkat annerpaamik 200x100x50 cm.-imik annertussusilerlugit aserorterneqarsimanissaat siumut qulakkeeqqaarlugu, eqqakkat immikkoortut kommunip tigooraavianut eqqagassaqaalersitsisoq igitsissaaq.

Eqqakkat toqqorneqarsinnaasut akuleriit

§ 21. Eqqagassat toqqorneqarsinnaasut eqqakkanut immikkoortunut allanut, atoqqissinnaangitsunut imaluunniit ikuallassinnaangitsunut eqqakkat ilaapput, ilaatigut marraasinnaapput, marriat, vinylit flise-llu.

Imm. 2. Eqqagassat annerpaamik 2 meterimik annertussusilerlugit aserorterneqarsimanissaat siumut eqqagassaqalersitsisumit qulakkeerneqariarlutik, kommunip tigooraavianut eqqakkat immikkoortut iginneqassapput.

Eqqagassat ikuallassinnaasut

§ 22. Eqqagassat ikuallatassat tassaapput eqqagassat ikuallassinnaasut navianaateqanngitsut, immikkoortiterneqarnissaannut, toqqortarineqarnissaannut imaluunniit immikkut isumagineqarnissaannut piumasagaataasumut ilaanngitsut aammalu toqqaannartumik atoqqiinissamut naleqqutinngitsut. Ilaatigut puukut, plastikkut pequtillu aseqqukut pineqarput.

Imm. 2. Eqqagassaqalersitsisup eqqakkat ikuallariaannaat kommunip tigooraavianukaatissavai, tunniunnerani imerpalasoqassanngillat imaluunniit 1,5 meterimit takinerunatik.

Imm. 3. Kommunalbestyrelsip eqqakkat ikuallajasut kommunip ikuallaavianut qanoq immikkoortissanersut piumasagaaserlugit ingerlatitsisinnaavoq.

Sanaartornermi atortut

§ 23. Sanaartornermi atortut eqqagassat nutarterinermit, nutaamik sanaartornermit imaluunniit isaterinermit pisuupput, ilaatigut qalissiaasinnaallutik, gipsiusinnaallutik imaluunniit kiffutaasinnaallutik.

Imm. 2. Sanaartornermi eqqakkat eqqagassaqalersitsisumit kommunip tigooraavianut iginneqassapput, iginneqannginnerinilu assersuutigalugu kikissat qinnerillu piiarneqarsimanissaat qulakkeersimassallugu.

Toqqaannartumik atoqqiineq

§ 24. Atoqqiinerit tassaapput, pequtit assigisaallu suliareqqinneqaaqqaaratik atorneqarsinnaasut.

Imm. 2. Pequtit atoqqinneqarsinnaasut kommunip tigooraavianut imaluunniit toqqaannartumik atoqqinneqarsinnaasunut tamanit tikinneqarsinnaasunut containerinut eqqagassaqalersitsisumit peerneqassapput.

Assakaasut

§ 25. Assakaasut tassaapput assakaasut qalequtai ilivitsut imaluunniit ilaannakui angallassisutinit assakaasulinnit tamaneersut.

Imm. 2. Assakaasut eqqakkat kommunip tigooraavianut imaluunniit kommunip isumaqatigiissuteqarfigisaanut ingerlatsisumut allanut eqqagassaqalersitsisumit tunniunneqassapput, tunniussinnginnermilu assakaasut saviminertaasa peerneqarsimanissaat qulakkeersimassallugu.

Eqqakkat navianartut

§ 26. Eqqakkat ulorianaatillit ilagaat kemikaliat, eqqiaanermi akussat, uuliakoq, lpeerit, spraydåsit akkumulatorit, elektronikkit, batterit, lysstofrør, qalipaaticut, puut avatangiisinut ulorianaatilinnik imallit, atortorissaarutit angisuut, qisuut suliaralugit mattussakkat, eqqakkat asbestillit, eqqakkat PCB-it aamma eqqakkat savimerngit akuutissallit.

Imm. 2. Eqqakkat angisuut igaffimmi errorsisarfirmilu atortorissaarutit eqqagassat angisuutut imaluunniit kommunip tigooraavianut eqqagassaqalersitsisumit tunniunneqarsinnaapput.

Imm. 3. Eqqagassat navianartut annikinnerusut kommunip avatangiisini eqqaaveqarfinut, eqqakkanut avatangiisinut navianaatilinnik ilisarnaatilinnut katersuivinnut tamanit anguneqarsinnaasunngorlugit inissinneqarnikunut imaluunniit kommunip tigooraavianut eqqagassaqalersitsisumit tunniunneqarsinnaapput.

Imm. 4. Pisuni tamani eqqagassaqalersitsisup eqqagassat navianartut tulluuttutigut poortorsimanissaat qulakkiissavaa:

- 1) puut eqqiluitsut, ussittut matoqqasullu,
- 2) pooreqqaarisaa imaluunniit imarisaanik ersarissumik nalunaaqutsersimasoq, imaluunniit
- 3) eqqagassanut navianaatilinnut assigiinngitsunut assigiinngitsunik pooqartitsineq.

Savimernit saffugassallu

§ 27. Savimernit saffugassallu eqqagassat ilaatigut ukuusinnaapput sikkilip timitaa, ilisiviit saffugassanit sanaat, ruujorit, inoqutigiit namminneq sanaartornermit aammalu nutarterinermit savimernit saffugassallu piikkat, savimernut aserorterivimmut savimernit mingunnikut aserortigassat, vaajari sisak imaluunniit kabelit akuleriit.

Imm. 2. Savimernit saffugassallu kommunip tigooraavianut imaluunniit kommunip isumaqatigiissuteqarfigisimasaanut ingerlatsisumut allamut eqqagassaqalersitsisumit tunniunneqassapput. Tunniussinnginnermi eqqagassat aserorterneqarsimanissaannut annertunerusumik tigooraavimmit piumasaqaateqartoqarsinnaavoq.

Pequtit igalaamernit annertunerusut

§ 28. Pequtit annertunerusut tarrarsuutit igalaallu igalasserfeqanngitsut ilaapput.

Imm. 2. Eqqagassat kommunip tigooraavianut eqqagassaqalersitsisumit tunniunneqassapput.

Qalorsuit, qassutit aamma ningittakkat

§ 29. Eqqakkat immikkoortuni ilaatigut aalisakkanut qassutit, qassutit, ningittakkat qalorsuillu ilaapput.

Imm. 2. Puttaqutillit, kallussaannaveeqqutit, oqimaaluttat allunaasallu akuerineqarsinnaapput, aatsaat qassutini/ningittakkani/qalorsuarni/nettinilu aalajangersagaasimappata.

Imm. 3. Qalorsuit, qassutit ningittakallu immikkoortiterlugit kommunip tigooraavianut imaluunniit umiarsualivimmi containerinut inissinneqarsimasunut eqqagassaqalersitsisoq igitsissaaq, igitsinnginnermilu oqummersat peersimanissaat qulakkiissallugu.

Qisuit igitat

§ 30. Qisuit igitat ilagaat sallilikkat issusuut, sallilikkat, paakkarutit, uigusaatit imaluunniit listit, qalipannikut akuutissanilluunniit tanitat, sanaartornermut atoqqiinernullu atoqqinneqarsinnaanngitsut.

Imm. 2. Qisuit eqqagassat kommunip tigooraavianut eqqagassaqalersitsisumit tunniunneqassapput, tunniunneqannginnerinilu betongitai, marraasersuinerit, kikissat, qinnerit, qalequt assigisaallu piiarsimanissaat kiisalu qalipaataatsitassamik oqimaatsumik akoqannginnissaa qulakkeeqqaassallugit. Qisuit igitat tunniunneqarneranni 2 meterimit takinerutinneqassanngillat.

Imaatigut angallassitutit qamutillu motorillit nutaanngilivallaarsimasut

§ 31. Eqqakkat immikkoortuni imaatigut assartuussinissamut angallatit, matumani umiatsiat, umiarsuit, umiatsiaaqqat aammalu umiaasaaqqat kiisalu nunakkut assartuussinissamut qamutit, matumani biilit, qamuteralaat ATV-llu pineqarput.

Imm. 2. Kommunip avatangiisinut ulorianaateqarsinnaanerininik misissuinerimut-malittarisassaq malillugu tunniussinnginnermi imaatigut assartuussinissamut angallatit imaluunniit nunakkut assartuussinissamut qamutit avatangiisinut ulorianaateqarsinnaanerininik misissorneqarnissaat eqqagassaqalersitsisup qulakkiissavaa. Avatangiisinut ulorianaateqarsinnaanerininik misissuisoqarsimanngippat, kommunalbestyrelsip imaatigut nunakkulluunniit assartuussisutininik tigusinissaq itigartissinnaavaa imaluunniit avatangiisinut ulorianaateqarsinnaanerininik misissuisitsineq eqqagassaqalersitsisumut akiligassanngorlugu aalajangilluni.

Imm. 3. Imaatigut angallassitutit imaluunniit qamutit avatangiisitigut piareersarneqarsimasut eqqagassaqalersitsisumit kommunip tigooraavianut tunniussissaaq, tassunnga atatillugu avatangiisinut ulorianaateqarsinnaanerininik misissorneqarsimanerat pillugu uppernarsaammik takutitsisoqassalluni. Nunaqarfinni illoqarfimmut qaninnerpaamut tigooraavimmut tunniussineq ingerlanneqassaaq. Annertunerusumik aserorterneqarnissaanut tigooraavimmit piunarsaateqartoqarsinnaavoq.

Imm. 4. Imaatigut angallassitutit imaluunniit qamutit nutaanngilivallaartut avatangiisinut navianartunik atortoqaraluarpata atortoqanngikkaluarpataluunniit, illoqarfimmi pinngortitamilu qimaannarneqarnissaat inertequtaavoq.

Kapitali 7

Eqqagassat immikkoortortat erseqqissumik innersuussinermut ilaapput

Issoq mingutsinneqarsimasoq

§ 32. Eqqakkat immikkoortuni issoq mingunnikoqavatangiisinut imaluunniit peqqissutsimut navianartunik akulik, avatangiisinik mingutsitsisinnaasutut imaluunniit innuttaasut peqqissusaannut aarlerinartortaqaarneranik takussutissartalik ilaavoq.

Imm. 2. Issoq mingutsinneqarsimasup nuunneqarnera eqqagassaqalersitsisoq kommunalbestyrelsimut, igitsinissamik periusissamik innersuussuteqartumut nalunaarutiginnissaaq. Igitsinissamik periusissamik innersuussisoqartinnagu issoq mingutsinneqarsimasoq iginneqassanngilaq.

Imm. 3. Tunniussinnginnermi issoq ujaraajaqqaarneqassaaq.

Imm. 4. Tigussaasumik itigartitsissut naapertorlugu eqqagassaqalersitsisup issoq mingunnikoq igissavaa. Akigititat atuuttut naapertorlugit eqqagassaqalersitsisoq issumik mingunnikumik tunniussinerminut akiliuteqassaaq.

Kapitali 8

Akitsuitit

§ 33. Katersisarnermut aammalu innersuussinissamut aaqqiissutinut ataasiakkaanut eqqagassalerinermut atatillugu kommunimit aningaasartuutigineqartunik matussusiisussanik kommunalbestyrelsi akiliutissanik aalajangersaassaaq. Akiliutit ukiumut naleqqussarnejartarput eqqagassalerinermullu Qeqqata Kommuniani akigititanut allattorsimaffimmi, kommunip nittartagaani tamanit takuneqarsinnaasumiipput.

Imm. 2. Eqqakkat illoqarfimmi, nunaqarfimmi nunap timaaniluunniit pilersinneqaraluarpata eqqagassaqalersitsisut tamarmik akiliuteqartassapput.

Imm. 3. Eqqakkanut nalinginnaasunut tunngatillugu eqqagassaqalersitsisoq nuunnermi imaartittarnissamut nalunaassaaq aammalu nooqqinnermi aaqqiissutip atorunnaarsinnissaanut nalunaaqqissalluni. Kommunip nittartagaatigut nalunaartoqarlunilu atorunnaarsitsisoqassaaq. Nuunnermut atatillugu eqqagassaqalersitsisoq atorunnaarsitsisimangikkuni, allap najugaqarfimmut nuunnermut atatillugu nalunaarnissaata tungaanut akiligassanik akiliisussaataitaavoq.

Imm. 4. Imaani nunakkullu assartuutit tunniussinermi avatangiisinut ulorianaateqarsinnaaneriniq misissorneqarsimangippata, misissuinissamut atatillugu akiligassiisoqassaaq.

Kapitali 9

Nakkutilliineq

§ 34. Qeqqata Kommuniani Teknikkimut Avatangiisinullu immikkoortortaarfik nakkutilliisussaataitaasuvoq.

Imm. 2 Nakkutilliisussaataitaasoq avatangiisit pillugit inatsimmi § 47 naapertorlugu suliffeqarfimmik eqqagassalerisunik nakkutilliartornissaq siunertaralugu suliffeqarfimmut appakaannissaminut, appakaanninnermi piffissaq sioqqullugu eqqagassaqalersitsisumik kalerrisaareqqaassaaq.

Kapitali 10

Naammagittaalliutit

§ 35. Matumani maleruaqqusat naapertorlugit aalajangiinernut naammagittaalliutit uunga nassiunneqassapput Qeqqata Kommunian, Teknikkeqarnermut Avatangiisinullu immikkoortortaq qeqqata@qeqqata.gl-ikkut imaluunniit allakkatigut.

§ 36. Kommunilbestyrelsip aalajangiineri avatangiisit pillugit inatsimmi kapitali 14 naapertorlugu Avatangiisinik illersuineq pillugu Naammagittaalliuuteqartarfimmut naammagittaalliuteqarsinnaapput.

Kapitali 11
Kinguneqartitsinerit

§ 37. Kalaallit Nunaanni pinerluttulerineq pillugu inatsimmi malittarisassat naapertorlugit akiliisitsinikkut pineqaatissiisoqarsinnaavoq:

- 1) §§ 5 imaluunniit 7, imm. 1 malillugit eqqakkanik immikkoortiterisussaataaneq ilioraasussaataanerlu malinneqanngippata.
- 2) § 12, imm.2, § 14, imm. 1 aamma 2 § 15, imm. 2, § 16, imm. 2, § 17, imm. 2 imaluunniit § 18, imm. 2 malillugu piunasaqaatinik, naalakkiutinik inerteqqutinilluunniit sumiginnaasut.
- 3) Inatsimmi § 19, imm. 2, 1. imm., § 20, imm. 2, § 21, imm. 2, § 22, imm. 2, § 23, imm. 2, § 25, imm. 2, § 26 imm. 3 aamma 4, § 27, imm. 2, § 28, imm. 2, § 29 imm. 3, imaluunniit, § 30, imm. 2 unioqqutitsisoq.
- 4) § 32-mi imm. 2 - 4 imi eqqakkanik igitsinermut atatillugu periutsinik takutinneqartunik malinninnginneq.

Kapitali 12
Atuutilersitsinermut atorunnaarsitsinermullu aalajangersakkat

§ 38. Malittarisassat uku ulloq 1. september 2025 atuutilersinneqarput.

Imm. 2. Tamatuma saniatigut Sisimiut Kommuniani igitassanik eqqaanermut maleruaqqusaq 6. februar 1996-imeersoq, Sisimiuni, Sarfanguani Itillimilu eqqagassalerinermut malittarisassiat 6. februar 1996-imeersoq aammalu Sisimiut Kommuniani uuliakunik akuutissanillu eqqakkat iginneqarnissaannut maleruaqqusaq 6. februar 1996-imeersoq atorunnaarsinneqassapput.

Taamaalilluni Qeqqata Kommuniani kommunalbestyrelsanit ulloq 26 .juuni .2025 akuerineqarpoq.

Malik Berthelsen (atsio.)
Borgmester

Angerlarsimaffinni inoqutigiinnit eqqakkanut Qeqqata Kommuniata maleruaqqusaa atuutilersinneqarpoq

Namminersorlutik Oqartussat, ulloq 4. juli 2025

Bentiarq Ottosen (atsio.)

Isumaginninnermut, Suliffeqarnermut, Nunamullu Namminermut Avatangiisinullu Naalakkersuisoq

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut